



Sisimiuni isumasioqatigiinnissamut tunngatillugu angalanermit nalunaarusiaq

KANUKOKA-p isumasioqatigiisitsinera: Meeqqanut inuusuttunullu tunngasutigut suleqatigiinneq 11.-13. september 2011-mut ingerlanneqartoq

KANUKOKA september 2011 isumasioqatigiisitsivoq, meeqqanut inuusuttunullu tunngasutigut assigiinngitsunik ilinniagaqartut akornanni suleqatigiinnerup nunamut tamarmut atuuttumik nakussassarnissaanik siunertaqartumik. Kommuneni sisamani borgmesterit isumaginninnermilu pisortat allallu meeqqanut inuusuttunullu tunngasunut attuumassuteqartut isumasioqatigiinnermi peqataapput.

Assigiinngitsunik ilinniagaqartut akornanni suleqatigiinnissaq ilisimasanillu agguaassisarnissaq sulinermi periutsinut qanoq ilanngunneqarsinnaanersoq oqaloqatigiisutigineqarpoq. Soorunami tamanna naammassisaqarsinnaanermut suliatinnilu pitsaassutsimut annertuumik sunniuteqartussaavoq. Iliuutsillu ataqatigiissarneqarnerunissaannut.

Aammalu ilisimasanik agguaassinerup pitsaanerulernissaa siunertaralugu isumaginninnermut atuarfeqarnermullu aammalu pisortat NGO-llu akornanni suleqatigiinnerup nakussassarneqarnissaa inassutigineqarpoq. Taamatullu aamma erseqqissaatigineqarpoq pisortani "ingerlatsivinni" naleqquttunik suleriaaseqarneq aqutsisup akisussaaffigaa.

Kammagiitta – Qingasaarineq pinnagu, tusagassiuutitigut saqqumilaartinneqarlunilu paasisitsissutigineqartarpoq. Ingerlataq Red Barnet Naamminersorlutillu Oqartussanit ingerlanneqarpoq. Ingerlataq Red Barnet aamma Namminersorlutik Oqartussat akornanni suleqatigiinneruvoq, Mary Fond-imillu aningaasanik tunineqarsimalluni. Kammagiitta pilersaarutit malillugit nuna tamakkerlugu ingerlanneqartussaavoq.

Isumasioqatigiinnerup naggataani KANUKOKA-p, paasissutissat pissarsiariuminarnissaannik aaqqissugaanissaannillu qulakkeerisumik periutsimik nuna tamakkerlugu assigiimmik ingerlanneqartussamik siunnerfeqarneq saqqummiuppaa, illoqarfiit sulisulluunniit tamarmik immikkut namminneq "matoqqasumik" periuseqartussaajunnaarlugit. Isumasioqatigiinnermi peqataasut kaammattorneqarput periutsimut taamaattumut atorfissaqartitaminnik kissaatigisaminnillu saqqummiusseqqullugit.

MIPI-p peqataanera

MIPI ilisimasanik agguaassinermut, assigiinngitsunik ilinniagaqartut akornanni suleqatigiinnermut aammalu iliuutsinik naliliinnermut tunngasumik aallarniuteqaqqullugu peqataanissamut qaaqquneqarsimavoq. Tamatuma saniatigut MIPI alaatsinaattutut peqataavoq, isumasioqatigiinneq meeqqanut inuusuttunullu tunngasutigut kommuneni assigiinngitsuni qanoq pisoqarneranik tusarfigissallugu periarfissatsialaamat. Tamatumalu saniatigut periarfissatsialak atorlugu kommunet ataasiakkaat suliaminnik ingerlatanillu MIPI-mut ilisimatitsisarnissaannik kaammattuivugut, MIPI-p paasissutissanik ujarlernermit piffissarujussuaq atulussinnartarmagu. Piffissaq tamanna

iluaqutaanerusumik atorreqarsinnaagaluarpat, meeqqanut inuusuttunullu tunngasutigut suliaqartuusut assigiinngitsut namminneerlutik MIPI-mik ilisimatitsisarnerat pitsaanerulersinnaagaluarpat.

MIPI-p saqqummiussaa

Aallaqqaasiullugu MIPI-p inuiaqatigiinni suliai inissisimaneralu erseqqissaatigaagut, peqataasut tamarmik MIPI-p sunik suliaqarneranik ilisimatinneqarniassammata aammalu kingusinnerusukkut saqqummiussarisatta tunuliaqutaa nassuiarlugu.

Ilisimasanik paarlaasseqatigiinneq

Saqqummiussinitsinni aqqissuussamik ilisimasanik aqquataarinerup pisariaqartinneqarnera pingaartipparput. Tassami MIPI, kommuunit aammalu Namminersorlutik Oqartussat ukiut tamaasa nukippassuit atorlugit ilisimasanik paarlaasseqatigiissutaareersimasinnaagaluanut ujaasineq aallaqqaataaneertariaqartarpaat, paasissutissat pissarsiariuminaappallaarnerat pissutigalugu. Tamanna inuiaqatigiinni ajornartorsiutaavoq puiguinnerneqarsinnaanngitsoq, aningaasat tamatumani atorreqartartut iluaqutaanerusumik atorreqarsinnaagaluarpat.

Inuiaqatigiinni avinngarusimasuni inissimasoqarfiusumi uagutsitut ittuni misilittakkatsinnik isumassarsianillu pitsaasunik paarlaasseqatigiittarnermik ajornannginnerulersitsisumik periutsumik pilersitsinissarput suli pingaarnaruvoq, tassami tamakkua sumiiffimmi uninngaannartarmata, tamannalu uggornaqaluni. Ajornerpaaffiani tamatuma inuiaqatigiinni siumukarneq ineriartornerlu killilertarpaa, aallaqqaataaniit aallartittuarterneq peqqutaalluni. Sulisut taarseraanerujussuat tamatta ilisimariigarput peqqutaqataalluni, periutsumik sulisunit ataasiakkaanit sumiiffigisamillu aallaaveqanngitsumik atuilernissaq suli pisariaqarnerulersippaa.

Iliuutsinik ingerlatanillu nuna tamakkerlugu atuuttumik *ingerlaavartumik* malinnaaneq ajornaqaaq, periutsumik ilisimasanik misilittakkanillu pissarsiariuminartunngortitsisumik pilersitsisoqartinnagu. Tamanna ajorluinnarpoq. Assersuutigalugu Else Christensen Kalaallit Nunaanni meeqqanut inuusuttunullu tunngasutigut isumaginninnermi iliuutsit pillugit qanittukkut nalunaarut isumasioqatigiinnermi saqqummiuppa, MIPI-llu suliap annertuup suliarineqarsimanera nassuerutigaa. Taavami aappaagu? Nuna tamakkerlugu atuuttumik periutsumik aamma sumiiffinni pisariaqartitsiffiusuni naleqquttumik iliuuseqarsinnaaneq ajornannginnerulersissavaa, tassalu iliuutsit iluaqutaasumik ataqatigiissarnissaat ajornannginnerulersissallugu.

Assigiinngitsunik ilinniagaqartut suliaqartullu suleqatigiinnerat

Tamatuma saniatigut ataqatigiissaagaasumik aqqissuussaasumillu assigiinngitsunik ilinniqaqartut suleqatigiinnissaat ujartorparput. Immitsinnut ilinniarfigilluarsinnaavugut, ilinniakkatta tungaasigut inuttullu, nukissanitsitsisarpoq sulinermilu piumassuseqalersitsisaraluni. Tamannali aamma ajunngitsumik ammasumillu pissuseqarluni oqaloqatigiissinnaanissatsinnik piumasaqaateqarpoq, ilisimasat nalunngisallu nammineq kisimi piginiarneranniit iluaqutaanerulluni, allanillu allaanerusumik suleriaaseqartunit navianartorsiortitaasutut misigisimanermiit pitsaanerulluni. Assigiinngitsunik ilinniagaqartut tamarmik assigiinngitsunik aallaaveqarnerat akuerissallugu pisariaqarpoq, tamannalu iluaqutaasinnaasorujussuulluni.

Assigiinngitsunik ilinniagaqartut suleqatigiinneranni iluaqutissaasoq tassaavoq periarfissanik, naammassiniagassanik ajoqutaasunillu ilinniakkat assigiinngitsut aallaavigalugit oqaloqatigiissuteqarsinnaaneq, tamatumuunalu suliassap silatusaartumik tunngavissaqartumillu ingerlannissaanut piareersarluarsimaneq anguneqartarluni. Tamatumuuna suliat ingerlatalluunniit patajaallisaannarneqarsinnaapput.

Aallaavittut anguniagaq tamatta isumaqatigiissutigaarput, tassalu inuiaqatigiinnik tamatsinnut iluaqutaasumik ingerlalluarnerusunik pilersitsinissaq, angunissaanullu ingerlaqatigiinnissarput qinertuinnartussanngorlugu.

Naliliineq

MIPI isumaqarpoq naliliineq sulinerup pingaaruteqartumik ilagigaa, siumut isiginermik pilersitsisarmat, ingerlasimanermi ajunngitsut ajortullu misissorneqartarlutik. Ingerlatassamut suliassamulluunniit tullermut tunngavissiilluartarluni, ilaginnaanani periuuserluunniit atortuarsimasaq maliinnarlugu iliuuseqarnikkut.

Tamannalu aamma iliuutsit malunniuteqanngitsut unitsinnissaannut periarfissiisarluni, aningaasat iliuutsinut allanut takussaasumik ajunngitsumik sunniuteqartunut atorneqarsinnaalersillugit. Iliuutsillu ataqatigiissaarneqarsinnaalernerannut aamma peqqutaasunut ilaasarluni aningaasallu atugassarisatta ikeqisut ajunnginnerusumik atorneqarnissaannut aqcutissiueqataalluni.

Namminersorlutik Oqartussanit akuttunngitsunik naliliinernit nalunaarutit annertuut saqqummersinneqartarput, nunamut tamarmut agguanneqartartunik, MIPI isumaqarpoq tamanna atussagutsigu assut periarfissaalluortoq. Isumassarsiffiusoq alla assersuutigalugu tassaavoq Meeqqanut inuusuttunullu iliuusissanik pilersaarutit, meeqqanik inuusuttunillu sullissinermi pisariaqartitsisoqarlunilu periarfissaqarneranik erseqqissumik takutitsisoq. Maannamummi misilittakkanik amerlasuunik peqareerpoq tamakkunanilu isumassarsiat atorneqarsinnaapput, maannakkut piviusunngorlugit iliuuseqaannartariaqarpugut.

Isumasioqatigiinnermi peqataasut tamarmik isumaqatigiipput assigiinngitsunik ilinniagaqartut akornanni suleqatigiinneq siunissami aqcutissaasoq, taamaammat MIPI-p periarfissami erseqqissaatigaa, maannamut sivilisuumik oqallisigereeratsigu naammalersoq, iliuuseqarnissamullu piffissanngortoq! Ingerlatanik suliaqarnermi assigiinngitsunik ilinniagaqartut akornanni suleqatigiinneq pikkoriffigilersimavarput, Kammagiitta aamma NAKUUSA tamatumunnga assersuutisaqqilluartuupput. Maannalu ulluinnarni sulinitinni tamanna ilaalersillugu aqqissuutissavarput.

Kammagiitta-mik saqqummiussineq – Qinnqasaarineq pinnagu

Martha Abelsen, KANUKOKA, Isumasioqatigiinneq aallarnerpaa ingerlataq Kammagiitta nassuiarlugu. Ingerlatami naleqartitat pingaartitat tassaapput akaarinninneq, akuerinninneq, ataqqinninneq, isumassiuineq ikinngutigiiilluarnelut. Tamakkuninnga meeqqanik ilinniartitsinermi siunertaasoq ingerlatami takorluukkamut toqqaannartumik attuivoq: Ulluinnarni meerartatsinnut inuusuttatsinnullu ineriartorneruneg toqqissisimanelu.

Naleqartitaasut Atuarfitsialak aammalu paaqqinnittarfitsialak aqputigalugit atuutsinneqalissapput, ingerlatamilu angorusutaq tassa ingerlatap nuna tamakkerlugu ingerlaavartumik atuuttunngortinnissaa.

Qinngasaarineq meeqqap inuunermini ingerlanissaanut inummut ilungersunartunik kingunerluuteqarsinnaavoq, tamannalu isumaqarpoq inuiaqatigiit tamanna ilungersuullugu isigisariaqaraat.

Lars Netteberg, Red Barnet, tamatumunnga tapertaliullugu erseqqissaatigaa, qinngasaarisarneq ajornartorsiutaasoq artornartoq, attorneqartuni assigiinngitsorpasuarnik kingunerluuteqartitsisinnaasoq, taamaasillunilu inuiaqatigiinnut ataatsimut isigalugu.

Kammagiitta – qinngasaarineq pinnagu, nutaajusumik aallaaveqarluni qinngasaarineramik eqqartuineruvoq, peqataasutut samminagit (tassa meeraq naalanngitsoq qinngasaarisoq/qinngasaarneqartoq nallinnartoq/isiginnaaginnartoq), ikinngutiginiinili pissutsit periaatsillu ajortumut noqitsisut atorineqartut, pitsaasumut allanngortitassat misissorlugit.

Ingerlatami siunertarineqarput børnehaveklasseeniit 3. klassimi atuartut, erseqqissaatigineqarlunili pisuni peqataasut pingasuusut: meeqqat, ilinniartitsisut/perorsaasutut ilinniarsimasut, angajoqqaallu. Attuumassuteqartut tamarmik peqataatinnissaat pingaartuuvoq, peqataasut tamarmik meeqqat ulluinnarni inuunerannut annertuumik sunniuteqartuummata.

Ingerlatami atortut atorineqartut Kalaallit Nunaanni pissutsinut naleqqussarnissaat assut pingaartinneqarsimavoq, pingaartitallu meeqqat pinnguarnersigut ilikkartinniarneqassallutik, meeqqat eqqartorneqartunik sapinngisamik ajunngitsumik paasinninnissaat qulakkeerniarlugu.

Palle Christiansen-ip, ilinniartitaanermut ilisimatusarnermullu Naalakkersuisup, oqaatigaa ajoraluartumik ingerlataq Kammagiitta pisariaqarsimasoq, ingerlatarlu taamaammat Atuarfitsialammik Meeqquerivitsialammillu pitsanngorsaanerme aallaavittut ilanngunneqassalluni. Naalakkersuisut ingerlataq malinnaaviginiarpaat, piffissap ingerlanerani Kalaallit Nunaanni atuarfinni tamani atuutsinneqalersussaq.

Palle Christensen-ip aamma erseqqissaatigaa ingerlatap ingerlanneqarnerani angajoqqaat ilaatinneqartut, uparuassallugu pingaaruteqarmat angajoqqaat aamma meeqqamik ineriartornerannut ileqqulersornerannullu akisussaassuseqarmata.

Ilassutigilaarlugu Palle Christiansen-ip quiasuppasilluni oqaatigaa, inersimasut immaqalu pingaartumik politikerit aamma ingerlatami saqqummiunneqartut iluaqutigisinnaassagaluaaraat.

Birgitte Snabe-p, Mary Fonden-imeersup Danmarkimi atuarfinni toqqakkani ingerlatap ingerlanneqarsimasup tunuliaqutaa oqaluttuaritsiarpaa. Kronprinsesse Mary-p ingerlataq Danmarkimut Australiamiit eqqussaraa, kingornatigullu atortorisat Kalaallit Nunaannut naleqqussarnissaanut periarfissaqalermat, ingerlataq naammasisaqaarfiulluuartarsimasoq nalunarunnaarsimammat suliaq aallartinneqarpoq. Mary Fond-imit taperserineqarluni ingerlatami atortut Kalaallit Nunaanni pissutsinut naleqqussarneqarsimapput, tassalu maanna meeqqanut inuusuttunullu tunngasutigut suliaqartut aammalu isumasioqatigiinnermi peqataasut ingerlatap atuutilertinnissaa akisussaaffigilerpaat.

Kammagiitta – kamassarineq pinnagu ingerlatap Kalaallit Nunaanni iluatsilluarnissaa kissaatigalugu oqaatigaa, meerarpassuillu inuunerminni ineriartornerisa toqqissisimanerisalu pitsaanerulernissaat pillugu suleqataarusulluni.

Egikkaalluni oqallinneq

Aalajangerneqarpoq gruppemik aqutsisussamik pilersitsisoqassasoq ingerlatap nunap atuariini paaqqinnittarfiinilu atuutilertinnissaanik ataqatigiissaarisussanik. Aqutsisut inisserersimassapput kingusinnerpaamik december-ip aallaqqaataani 2011.

Atuartitsinerup ingerlanissaata suliarinera ingerlanneqalereerpoq, ingerlataq pingaartuuvoq salliutinneqartariaqarlunilu. Tamatumalu saniatigut atuariup angajoqqaallu suleqatigiinnerisa nakussassarnissaanut periarfissaalluarluni, angajoqqaat meeqqamik atuarneranni peroriartornerannilu peqataatinnerulerlugit. Naggasiullugu eqqartorneqarpoq assigiinngitsunik ilinniagaqartut akornanni suleqatigiinnginneq ataatsimut isiginnilluni piumannginermik patsiseqanngitsoq, kisiannili assigiinngitsunik ilinniagaqartut nunami tamarmi suleqatigiinermik aaqquissuussinermik tapersiisumik aalajangersumik periuseqarnissaq pisariaqartinneqaannarluni.

Workshop, isumagininnermut atuarfeqarnermullu tunngasutigut.

Kommune Kujalleq meeqqat inuusuttullu sumiginnagaasut sammineqarnerunissaannik kissaateqarpoq. Ilisimasanik agguaassineq aammalu assigiinngitsunik ilinniagaqartut suleqatigiinnerat eqqartorneqartumi periarfissat killissarititaasullu oqallisigineqarneranut atussallugit piukkunnarluinnarput, aammalu sumiiffinni assigiinngitsuni ataasiakkaani pisinnaasanik atorfissaqartitsinermi pisinnaatitaaffiit ataqatigiissaartinniarnannut. Tamakkulu saniatigut sulisut inuttut ineriartornissaminnut periarfissarissaarnerusariaqarput.

Kommunip September 2011-imi ilinniagaqarneq pingasunik immikkoortortalik ilinniartunut 20-kkaartunut inissaqartoq aallartippaa.

Immikkoortuni makkua sammineqarlutik:

- Ilinniakkat assigiinngitsut atorneri
- Akuliuttarnerit
- Meeqqat sumiginnakkat ilaqutaallu pillugit ilisimasat.

Ingerlanera qaammatinik marlunnik sivisussuseqarpoq ilinniartullu sumiginnagaasunut nalinginnaasumik ineriartortunut sanilliullugit qanoq ineriartortarnerannik, tarnimikkut naalliuutaannik aammalu pitsaasumik perorsaariaatsimik tarnillu pissusaanut tunngasunik paasinnitsissallugit.

Peqatigiiffiup Grønlandske Børn kommune suleqatigalugu ingerlataq Sapiik aallartissavaa. Tassalu inuusuttut akunnerminni siunnersueqatigiittarnerat, inuusuttut imminnut tatiginerannik inooqatigiinermilu pisinnaasaannik annertusaanissamik siunertaqartoq, aammalu inuusuttut ilinniagaqalernissamut kajumilersitsisuususaq.

Sulisut taarseraakkaluaqisut meeqqanut inuusuttunullu tunngasunik suliaqartuusut sapinngisamik amerlanerpaat peqataatinniarlugit suliaq ingerlanneqarpoq, aammalu kommune, politiit, peqqinnissaqarfik, sullitat qanimut tikillugit sullissisut allallu piunassutsiminnik suliaqartuusut attaveqarfigilluarneqarput.

Taamaakkaluartuq arajutsisimaneqanngilaq angajoqqaat ilaat "piffissamik atorluaasimasut" weekendimi meeqqanut inuusuttunullu periarfissiineq paaqqinniffittut atorlugu, namminneq festerlutik.

Qaasuitsup Kommunea

Tassani pinaveersaartitsinerup pingaartinnissaa toqqarneqarsimavoq, meeqqanut inuusuttunullu tunngasutigut piaartumik iliuuseqarneq, isersimaartarfeqartitsineq sammisassaqaartitsinerillu aqqutigalugit.

Atuarfinni atuartunut pisariaqartitsineq naapertorlugu suulluunniit pillugit oqaloqatigisartaqaartitsineq eqqunneqarsimavoq.

Red Barnet suleqatigalugu anaananut inuusuttunut isersimaartarfittut atortumik illumik pilersitsisoqarsimavoq. Tamatumalu saniatigut niviarsiaqqanut kinguaassiuutitigut atornerlunneqarsimasunut tapersersuisunik gruppimik pilersitsisoqarsimalluni. Aningaasakillioortoqaraluartuq pisinnaasatigut iliuuseqartoqarpoq. Taamaamat aamma pingaartuuvuq soqutigisat tullerriaarnissaat, aningaasaatigisat atorluarneqarnerunissaat siunertaralugu.

Qeqqatta Kommunea

Kommunimi pinaveersaartitsinermut, piaartumik iliuuseqarnermut atatillugu assigiinngitsunik ilinniagaqartut suleqatigiinnerat salliutinneqarpoq. Akuttunngitsunillu tapersersortit ataatsimeeqatigiittarlutik. Tapersersortit ataatsimiittarneri aamma angajoqqaat meeqqamik ineriartornerannut tunngasutigut atuarfimmik suleqateqarnermi qanimuunerusoq peqataatinnissaannik siunertaqarput. Oqaloqatigiinnerit angajoqqaat ilinniarsimasutullu meeraq pillugu sulisut, tassalu ilinniartitsisut, perorsaasutut ilinniarsimasut assigisaasalu akornanni akisussaassutsimik agguagaqarnerup nakussassaaqataaffigissavaat.

Suleqatigiissitanik aqutsisutullu gruppenik pilersitsisoqarpoq sulinermi ilisimasat tungaasigut qaffariaataasussamik atuutsilersitsinissamik, kommunemilu akisussaassutsip piginnaasaqarnerullu agguagaanerata nassuiaasernissaanik siunertaqartumik. Erseqqissumik iliuusissanut pilersaarusiornikkut nukiit atorluarneqarnerulissapput.

Piaartumik allatigullu iliuuseqarnerit saniatigut kommunep meeqqat atuarfiannik naammassinnereerlutik ingerlaqqinngitsunut sinneruani sammisimavai. Taakkua aamma maluginiarneqarnissamik pisariaqartitsipput, inuunerminni ingerlariaqqinnissaminnut kaamisalaarneqarnissaq atorfissaqartikkajuttaramikku.

Tamanulli tunngatillugu meeqqanut inuusuttunullu tunngasutigut ataqatigiissumik naammassiniagassanik isiginninniarsarinearpoq, tassami pissutsit ataqatigiikkajuttuusarmata.

Kommuneqarfik Sermersooq

Kommunemi tamarmi amerlasoorpassuarnik iliuuseqartoqarpoq. Kommuneqarfik Sermersuumi aamma iliuutsinut tunngatillugu ataatsimoortumik isiginninneq pingaartinneqarsimavoq.

Piaartumik iliuuseqarneq ilaqtariinnullu tunngasunik iliuutsit pingaartinneqarput, assersuutigalugu inuusat atorlugit ingerlataq, ilaqtariinni ineriartorneq pillugu pikkorissaaneq, gruppit tapersersuisut allallu.

AKT-ilinniartitsisut atorfinitsinneqarput (Adfærd/pissusilersorneq, Kontakt/attaveqarnek Trivsel/ineriartorneq), peqataatitsineq aallaavigalugu sulisut. Atuarfiit meeqqanik pissusilersornikkut allatigulluunniit ajornartorsiuteqartunik samminninnermut pitsaanerulissapput, klassertik qimallugu immikkut atuartitaasariaqalersinnaanerigaluat pinngitsoortinniarlugu. Soorunami meeqqat klasselluunniit ataasiakkaat eqqortumik aaqqiiviginiarneri mianernartorujussuuvog.

Aammattaaq ungasissumiit atuartitsineq misiligutaasumik ingerlanneqarpoq, tamatigut nunaqarfinnut ilinniartitsisunik pissarsisoqarsinnaasanngimmat. Tamatuma meeqqat inuusuttullu ungalliunerusuniittut atuartinneqarnissamut pisinnaatitaaffiata naammassineqarnissaa periarfissippaa ilinniartitsisussaaleqineqaraluartillugu. Kommunep ilinniartitsisut marluk angalasartussat atorfinitsissimavai pisariaqartitsineq naapertorlugu aallartinneqarsinnaasut, amerlanertigut sapaatip akunnerini marlunni pingasuniluunniit ornitaminniittarsinnaasasut. Maanakuugallartoq aaqqissuussineq pillugu iluarinninniutinik nalunaaruteqartoqartarsimavog.

Tamatumalu saniatigut aamma sulianut isumaginninnermut tunngasunut atatillugu sumiiffinni sulisut suleqatigalugit sulianik pisariaqartitsineq naapertorlugu suliaqarsinnaasunik angalaartartussanik pilersitsiniartoqarpoq. Erseqqissaatigineqarpoq sumiiffinni innuttaasunik suleqateqartarnissaq pineqarmat, nakkutilliisutut inissisimassanatik. Suleqatigiinnerup aamma peqqinnissaqarfimmit peqataaffigineqarnissaanut annertusineqarnissaa kissaatigineqarpoq.

Isumasioqatigiinnerup oqaatiginiagai pingaarnerit

- Akuttunngitsunik naapittarnissaq, oqaloqatigiittuarnissaq suleqatigiinnermut siumukarnissamullu pingaartuuvog.
- Ataatsimoortumik anguniakkat anguniarneranni akisussaaqatigiittariaqarpugut – meeqqat toqqissisimanartumik meeraanissamut pisinnaatitaaffiat pingaartillugu.
- Meeqqanut inuusuttunullu periusissatut aalajangiussat aallaavigalugit ataqatigiissunik iliuuseqarnek.
- Ilinniagaqarnek annertuumik pisariaqartinneqarpoq aammalu iliutsit ataqatigiissumik aaqqissuussaanaissaat.
- Illoqarfii/kommunet tamarmik pilersaarutit malillugit pisoqariataarneranilu angalasartussanik peqartariaqarput.
- Pinaveersartitsineq pingaartuuvog - pilersaarusionek aallaavigalugu "qatserisartutut" sulinani = pitsaanerusumik nukinnik atuneq.
- Suleriaatsini assigiinngitsunik ilinniagaqartut suleqatigiinnerat ilaatinneqassaaq.
- Iliuuseqarnissamut piffissanngorpoq! Iluuqutaasumik suleriaatsit atuutsinneqalernissaat suliffinnilu pitsaasunik avatangiiseqarnissaq pisortaasup akisussaafigaa.

- Ileqqutoqqat qimakkuminaassinnaasarput – Nutaamik eqqarsarnej tapersersussavarput akimmisaartitsinata!
- Kalaallit Nunaanni meeqqat tamarmik illersorneqarsinnaasumik ajunngitsumillu ilinniagaqarnikkut inooqatigiinnikkullu atuarfimmi ingerlanissaat qulakkeerneqassaaq.
- Ingerlaavartumik ilisimasat agguanneqartuarnissaannik qulakkeerisumik ataqqatigiissumik aqqissuussamik periutsumik atuisaagut.

Naggataatigut oqaatiginiakkat

Isumasioqatigiinnermi aalajangiunneqarpoq Kalaallit Nunaanni meeqqat inuusuttullu akornanni pitsaanerusumik ineriartorneq siumukarnerlu qulakkeerniarlugit assigiinngitsunik ilinniagaqartut akornanni suleqatigiinneq, ilisimasanik agguassineq ataatsimoortumillu isiginnittumik iliutsit pisariaqartut.

MIPI neriuppoq isumasioqatigiinneq taanna iliutsinik malitseqartinneqassasoq.